

ՄԻ ՄԱՆՐԱՆԿԱՐԻ ՆՈՐՈՎԻ ՄԵԿՆԱԲԱՆՄԱՆ ՓՈՐՁ

Մեծ Հայքի Մոկաց աշխարհի Մյուս Իշայր գավառում՝ Բաղեշ քաղաքից 35 կմ հարավ-արևելքում է գտնվել Խիզան քաղաքը։ Այն հաճախ հիշատակվել է XIV-XV դդ. ձեռագիր հիշատակարաններում՝ որպես հայկական գրչության կենտրոն։ Խիզանից հայտնաբերվել է մի ձեռագիր (Երևան, Մեսրոպ Մաշտոցի անվան մատենադարան, ձեռագիր 2865, 4բ, Պատմագիրք Հայոց), որի մանրանկարն¹, ըստ ընդունված կարծիքի, հետևյալ բովանդակությունն ունի։ Պատմահայր Մովսես Խորենացին գրում է իր «Հայոց պատմութիւն»-ը, պատվիրատու Սահակ Բագրատունին ձեռքը մեկնել է դեպի պատմահայրը՝ հանձնարարական շարժումով, իսկ նրանց ոտքերի մոտ՝ հատակին, ծնկաչոք կեցվածքով ձեռագրի ստացող Ներսես Գևորգեցին է (նկ. 1)։ Նկարի տակ ծանոթագրված է. «Սահակ Բագրատունին խնդակն Մովսես Խորենացւոյ բան»։ Մանրանկարը համարվում է 1567թ. գործ, իսկ ծաղկողի անունը հայտնի չէ։



Նկ. 1

Ինչպես նշվեց, մանրանկարը համարվում է Խիզանի դպրոցի ստեղծագործություններից, սակայն, ամենայն հավանականությամբ, մանրանկարի հեղինակը Կիլիկիայի մանրանկարչական դպրոցի (կազմավորված XII դարում և գոյատևած մինչև XIV դարի 80-ական թթ.) ներկայացուցիչ է, քանի որ նկարը բավականին ցայտուն կերպով կրում է Կիլիկյան դպրոցի ազդեցությունը։ Իսկ ինչ վերաբերում է մանրանկարի բովանդակությանը, ապա, մեր կարծիքով, այն չի համապատասխանում իր ներքոգրյալ ծանոթագրությանը և արտահայտում է բոլորովին այլ ժամանակաշրջան, միջավայր ու գործիչներ։ Մեր կարծիքով, նկարում պատկերված թագա-

կիր անձնավորությունը կարող էր լինել Կիլիկյան Հայաստանի թագավոր Լևոն II Մեծագործը (1198-1219թթ.), իսկ մյուս երկուսը՝ նրա ժամանակակիցները։ Բերենք փաստարկներ։

1. Թագակիր անձնավորությունը Սահակ Բագրատունին լինել չէր կարող հետևյալ պատճառով։ Սահակ Բագրատունին թագավոր չէր, իշխան էր, ապա՝ մարզպան (481-482թթ.) և չէր կարող կարմիր կոշիկներ ու թագ կրել, այն էլ՝

կիլիկյան թագ (հմմտ. Լևոն II արքայի թագը՝ ըստ դրամի (նկ. 2, 3)², Լևոն III արքայի թագը (նկ. 4)³, Լևոն V արքայի թագը (նկ. 5)⁴:



նկ. 2



նկ. 3



նկ. 4



նկ. 5

2. Կարծեցյալ Մովսես Խորենացու փոխարեն տվյալ պատկերում կարող էր իսկապես Ներսես Լամբրոնացին, ով իր կյանքի վերջին տարիներին պաշտոնավարել էր Լևոն II-ի արքունիքում որպես ատենադպիր, պալատական խորհրդատու և թարգմանիչ⁵:

² Կատվալյան Մ., Լևոն Բ Մեծագործ, Հայկական սովետական հանրագիտարան, ՀՍՍՀ ԳԱ հրատ., հ. 4, Եր., 1978, էջ 589:

³ Հայկական մանրանկարչություն, Դիմանկար, Լևոն Գ թագավոր, Կեռան թագուհի և նրանց որդիները նկ. N 13:

⁴ Նույնի, Լևոն Ե թագավոր, նկ. N 35:

⁵ Աբգարյան Գ., Գրիգորյան Գ., Ներսես Լամբրոնացի, Հայկական սովետական հանրագիտարան, ՀՍՍՀ ԳԱ հրատ., հ. 8, Եր., 1982, էջ 253:

3. Հանձին ձեռագրի պատվիրատուի՝ կարծեցյալ Ներսես Գևուհեցու, պետք է մահմեդական գործչի տեսնել, քանի որ իր կրոնական պատկանելությանը համապատասխան, նա կրում է մահմեդական փաթոց, իսկ իր ոտաքոբիկ ու ծնկաչաք կեցվածքով հուշում, որ իրենից վերև գտնվող երկու կերպարների հանդեպ ստորադաս վիճակում է:
4. Շինության աշտարակը և ներքին հարդարումը նս բնորոշ են մահմեդական կառույցներին:
5. Մանրանկարի խորքում՝ պատվանդանի վրա դրված գիրքը, որը համարվում է Մովսես Խորենացու երկը, ամենայն հավանականությամբ, Ղուրանն է, որը մահմեդականի երդման արարողության կարևոր ատրիբուտներից մեկն էր՝ այս դեպքում մահմեդական գործչի հնազանդության ու հավատարմության երաշխիքը:

Իսկ կոնկրետ ի՞նչ իրադարձություն է արտացոլում մանրանկարը: Նրա պատմական հենքը կարելի է գտնել Լևոն II-ի և հարևան Իկոնիայի (Թուրի) սելջուկյան սուլթանության քաղաքական հարաբերությունների մեջ: Կիլիկյան Հայաստանի միջազգային հարաբերությունները Լևոն II-ի կառավարման տարիներին բավականին բարդ էին: Այդ տարիները համընկել էին Մերձավոր Արևելքում տեղի ունեցող խոշոր քաղաքական իրադարձություններին և արմատական փոփոխություններին: 1176թ. Միդիակեֆալտի ճակատամարտում Իկոնիայի սելջուկներից կրած ծանր պարտության հետևանքով Բյուզանդիան այլևս Կիլիկյան հայկական թագավորության հետ անմիջական սահման չուներ և զրկվել էր Արևելքում որևէ դերակատարություն ունենալու հնարավորությունից: Պատմության թատերաբեմից վերջնականապես հեռացել էին Կիլիկիայի երբեմնի ամենավտանգավոր ախայանները՝ Սեբաստիայի և Մելիտենեի Դանիշմենյան ամիրայությունները: Եգիպտոսի սուլթան Սալահեդդինի (1169-1193թթ.) հարվածների տակ գրեթե կործանման եզրին էին հասել Արևելամիջերկրածովյան խաչակրաց պետությունները: Ներքին գահակալական կոիվներից սաստիկ թուլացել էին Իկոնիայի և Հալեպի սուլթանությունները: Չնայած բարդությանն ու հաճախակի փոփոխականությանը ընդհանուր առմամբ Կիլիկիայի համար միջազգային այդ իրադրությունը բարենպաստ էր: Լևոն II-ը հիմտորեն կարողացավ օգտվել դրանից, առավելագույնս ընդարձակեց իր պետության սահմանները և «ծավալապաշտությունը դարձրեց Հայաստանի արտաքին քաղաքականության հիմնաքարը»⁶: Լևոն Մեծագործը կապեր ուներ թե՛ պապականության, թե՛ Հռոմեական Սրբազան կայսրության և թե՛ Բյուզանդիայի հետ: Միջազգային ասպարեզում շատ էր բարձրացել նրա անձնական հեղինակությունը: Երկրի շահերից բխող անկախ և ճկուն դիվանագիտության որդեգրումը, Կիլիկիայի տարածքների ընդարձակումն ու պաշտպանականության ամրապնդումը, պետական համակարգի արդիականացմանը միտված բարեփոխումների իրականացումը ուղեկցվում էին երկրի բնակչության սովորացումով, նրա տնտեսական վերելքով, քաղաքների և արտաքին առևտրի զարգացումով: Այս գործոնների շնորհիվ Կիլիկյան հայոց պետությունն այնքան հզորա-

⁶ Տեք-Պետրոսյան Լ., Ինչպե՞ս իրենք և հայերը, հ. Բ, Եր., 2007, էջ 231:

ցավ, որ դարձել էր Միջերկրական ծովի արևելյան ափի ուժեղ պետություններից մեկը, և դրա ազդեցությունը շարունակաբար զգացվեց թագավորության հետագա ողջ գոյության ընթացքում:⁷

Լևոն II-ը դեպի արևելք պետության տարածքն ընդլայնել էր ի հաշիվ Անտիոքի իշխանության⁸: Նա դիվանագիտական ճկունություն ու խռիմություն էր ցուցաբերել նաև Իկոնիայի սուլթան Խիլ-Արսլան II-ի (1156-1192թթ.) որդիների միջև ծագած գծտության ժամանակ: Նա արշավել էր արևմուտք և հյուսիս, գրավել Իսադլիայի և Կապադոկիայի սահմանամերձ շրջանները: Իկոնիայի սուլթան Խիլ-Արսլանը դեռևս կենդանության օրոք էր իր պետությունը բաժանել որդիների միջև, ինչը թուլացրել էր Փոքր Ասիայի սելջուկների ռազմական հզորությունը և կասեցրել նրանց արշավանքները Կիլիկյան Հայաստան: Այժմ Լևոնն ինքն էր արդեն հաջող պատերազմներ մղում սելջուկ-թուրքերի դեմ, ուստի Խիլ-Արսլանի՝ միմյանց դեմ մարտնչող որդիներին այլ բան չէր մնում, քան ապավինել նրա հովանավորությանը: 1195թ. նրանցից Մուղիս եղ-դին Տոդրուլշահը՝ Մալիքը (Ալբիստանի եմիրը 1192-1201թթ.), գալիս է Լևոնի մոտ, ընդունում նրա գերիշխանությունը և իրեն կախյալ հայտարարում նրանից:⁹ Լևոնն իր հերթին փայլուն կերպով իրականացնում է իր խոստումը. նա արշավում է Մալիքի եղբոր՝ Կեսարիայի տեր Նուր եղ-դին Սուլթանշահի դեմ, հաղթանակ տանում նրա նկատմամբ, գրավում անգամ Կեսարիայի հարևան մի բնակավայր: «Արիագոյնն Լևոն տիրեաց երանասուն և երկու բերդի, էր գոր նախնիքն իւր կալեալ էին և էր գոր ինքն էառ ի յունաց և ի թուրքաց... Եւ էլ մեծն Լևոն և էառ բերդ մի մերձ Կեսարիոյ և ետ նմա» մեկիքին՝ Ալպիստանի տիրոջը:¹⁰

Յավոք, աղբյուրները լռում են Լևոնի և Մուղիս եղ-դինի միջև կնքված որևէ գրավոր համաձայնագրի առկայության մասին, սակայն դժվար չէ կոտակել, որ այդպիսին եղել է. ռազմական օգնության դիմաց գերիշխանության ճանաչումը և փոխադարձ պարտավորությունները պետք է որ ամրագրվեին պայմանագրով:

Հետագայում նա՝ թագավոր օծվելուց հետո, Լևոն II-ին տեսնում ենք Իկոնիայի սուլթանության այս կամ այն թագաժառանգին իր քաղաքական աջակցությունը ցուցաբերելիս,¹¹ սակայն դրանք ավելի շուտ դրվագային միջամտու-

⁷ Կիրակոս Գանձակեցի, Հայոց պատմություն, թարգմանությունը, առաջաբանը և ծանոթագրությունները Վարազ Առաքելյանի, զլ. Գ. էջ 118: Միքայելյան Գ., Կիլիկիայի հայկական պետության պատմություն, Եր., 2007, էջ 178 (Միքայել Ասորի, Ժամանակագրություն, էջ 501): Նույնի, էջ 178-179 (Վարդանայ Բարձրաբերդցույ Պատմություն տիեզերական, էջ 182): Օրմանեան Մ., Ազգապատում, հ. Ա, Պեղրուք, 1959, էջ 722:

⁸ Միքայելյան Գ., Կիլիկիայի հայկական պետության պատմություն, էջ 144:

⁹ Տեր-Պետրոսյան Լ., նշվ. աշխ., հ. Բ, էջ 234 (տե՛ս Մմբատ, Տարեգիրք, Վենետիկ, 1956, էջ 212):

¹⁰ Միքայելյան Գ., նշվ. աշխ., էջ 155 (Միքայել Ասորի, Ժամանակագրություն, էջ 501-502):

¹¹ Գիյաս եղ-դին Քեյ խոսքովի և եղբոր՝ Ռուբն եղ-դինի միջև ընթացող հակամարտության ժամանակ Լևոն II-ն աջակցում էր Ռուբն եղ-դինին (տե՛ս Զովհաննիսյան Ա., Կիլիկիայի հայկական թագավորության և Իկոնիայի սուլթանության հարաբերությունները 1198-1219թթ., էջմիածնի հանդես, 2012, էջ 86): Սուլթան Գիյաս եղ-դին Քեյ խոսքովի (1205-1210թթ.) որդիներ Իզզ եղ-դինի ու Ալա եղ-դինի՝ զառի համար սղված պայքարի ժամանակ Լևոնն օգնում էր Ալա եղ-դինին: Սակայն Իզզ եղ-դինը ուն Ջելալ եղ-դինի միջնորդությամբ

թյուններ էին, և կարծես թե կախյալ ճանաչվելու կամ գերիշխանություն ընդունելու խնդիր որևէ մեկի առջև չէր դրել: Ի նկատի առնենք, որ սկսած XIII դարասկզբից՝ Իկոնիայի սուլթանությունը վերականգնել էր նախկին հզորությունը և իր հերթին աջակցում էր Անտիոքի դքսությանն ու Հալեպի սուլթանությանը՝ ընդդեմ Կիլիկիայի, ուստի միջազգային իրավիճակը մերձավորարևելյան տարածաշրջանում կտրուկ փոխվել էր՝ հոգուտ Կիլիկյան Հայաստանի հակառակորդներին:¹² 1216թ. սելջուկյան զորքերն անգամ երիտուժել էին Կիլիկիա, նրանց հաջողվել էր մի քանի օրվա ընթացքում կողոպտել սահմանամերձ շրջանները, գերեվարել մարդկանց, տիրանալ մեծ թվով անասունների ու նշանակալի ավարի: Լևոն II-ը հիվանդության պատճառով չէր մասնակցել ռազմական գործողություններին:¹³ Ըստ Սմբատ սպարապետի՝ 1216թ. սելջուկների հետ բախումներն ավարտվել էին հայերի պարտությամբ, որի պատճառներից մեկը ժամանակագիրը համարում է թշնամու գերակշռությունը, իսկ մյուսը՝ Լևոնին ենթակա որոշ իշխանների անտարբերությունն ու անհավատարմությունը:¹⁴ 1218թ.¹⁵ կնքված հաշտության պայմանագրով Լևոն II-ը գերիներին ազատում է՝ տարածքային զիջումների և սուլթանի գերակայությունը ճանաչելու պայմանով: Կարծիք կա նաև, թե Լևոնը գերյալ իշխաններին ազատել է ոչ թե զիջումների գնով, այլ ուժի ցուցադրությամբ:¹⁶ Այնուամենայնիվ, սելջուկ-թուրքերի՝ Կիլիկիայի դեմ ունեցած ռազմական հաջողությունները վկայում են, որ Լևոն II-ը կորցրել էր նրանց նկատմամբ նախկինում ունեցած իր ազդեցությունն ու հեղինակությունը, ուստի «իր գահակալման վերջին տարիներին ստիպված էր զգալի զիջումներ կատարել հարևան Իկոնիայի սուլթանությանը»:¹⁷ շեռնաբար, մանրանկարում արտացոլված դովագը կարող է վերաբերել Լևոն Մեծագործի կառավարման այն ժամանակահատվածին, երբ Կիլիկյան Հայաստանը նա դարձրել էր Միջերկրական ծովի արևելյան ափի ուժեղ պետություններից մեկը, իսկ Իկոնիայի սուլթանությունը գտնվում էր թուլացած ու պառակտված վիճակում:

Նկարագրված իրադարձությունները կարծես ամրապնդում են մեր այն կարծիքը, թե մանրանկարում պատկերված ծնկաչոք անձնավորությունը բարձրաստիճան մահմեդական է և ստորադաս վիճակում է գտնվում Լևոն Մեծագործի հանդեպ: Նրա ոտաբռնիկ ու ծնկաչոք դիրքը շեշտում է թագակիր անձնավորու-

կարողանում է առանձին դաշինք կնքել Լևոնի հետ և չեզոքացնել նրանից եկող փոսեզը (տե՛ս Միքայելյան Գ., նշվ. աշխ., էջ 172):

¹² Հովհաննիսյան Ա., Կիլիկիայի հայկական թագավորության և Իկոնիայի սուլթանության հարաբերությունները 1198-1219թթ., էջ 85:

¹³ Միքայելյան Գ., նշվ. աշխ., էջ 173:

¹⁴ Նույնի, էջ 175 (Սմբատայ Սպարապետի պատմութիւն, էջ 107-108):

¹⁵ Հովհաննիսյան Ա., Կիլիկյան Հայաստանի և Իկոնիայի սելջուկյան սուլթանության միջև 1918թ. կնքված հաշտության պայմանագրի շուրջ, «Բանբեր Երևանի համալսարանի», «Միջազգային հարաբերություններ. Քաղաքագիտություն», Եր., 2010, էջ 73:

¹⁶ Տեր-Պետրոսյան Լ., նշվ. աշխ., հ. Բ, էջ 275-276 (Վահրամ Մաքրոնի, Ոտանալոր պատմութիւն, էջ 216; շեթում արքայորդի, ճաշոց, էջ 586-587):

¹⁷ Հովհաննիսյան Ա., Կիլիկիայի հայկական թագավորության և Իկոնիայի սուլթանության հարաբերությունները 1198-1219թթ., էջ 93:

թյունից՝ տվյալ դեպքում Լևոն II-ից, կախման մեջ գտնվելու և հեռազանդ լինելու մասին: Հնարավոր է, որ պատկերվածը Խլիճ-Արսլանի որդի Մուղխ Էդ-դին Տողրուլշահն է, քանի որ, ինչպես տեսանք, Մուղխ Էդ-դինն էր ռազմական աջակցության դիմաց իրեն կախյալ հայտարարել Լևոնից, բացի դրանից, Լևոնը Մուղխ Էդ-դին - Նուր Էդ-դին հակամարտության տարիներին ավելի ուժեղ էր, ինքնուրույն ու անկախ: Այդ տարիներին նրա մղած պատերազմները սելջուկների դեմ կրում էին հարձակողական ու նվաճողական բնույթ, երբ սելջուկ-թուրքական հետագա գանակալական պայքարների ընթացքում, ինչպես վերևում նշվեց, Լևոնն այլևս նախկին ազդեցիկ դիրքը չունեւր տարածաշրջանում, նրա մղած պատերազմները սելջուկների դեմ արդեն պաշտպանողական բնույթ էին կրում և անգամ ուղեկցվում տարածքային զիջումներով:

Եթե ընդունենք, որ խնդրո առարկա մանրանկարում լուսապսակով պատկերված անձնավորությունը Ներսես Լամբրոնացին է, ապա անվիճելի կլինի այն փաստը, որ Լևոն II-ի հանդեպ պարտավորություններ ստանձնած բարձրաստիճան մահմեդականը Մուղխ Էդ-դին Տողրուլշահն (Մալիք) է: Խլիճ-Արսլանի որդիների գծությունն ու Լևոն Մեծագործի միջամտությունն այդ առնականումներ տեղի է ունեցել 1195 թ.¹⁸, երբ Ներսես Լամբրոնացին տակավին ողջ էր: Նա Լևոնի արքունիքի ատենադպիրն էր և առանց նրա մասնակցության դժվար թե կայանար Մուղխ Էդ-դին Տողրուլշահին վասալ ճանաչելու պայմանագիր-պարտավորագրի կնքման արարողությունը: Լամբրոնացին կնքել էր իր մահկանացուն 1198թ. հուլիս ամսին՝ Լևոնի թագադրությունից (1198թ. հունվարի 6) ամիսներ անց, այսինքն՝ չէր կարող ներկա լինել հետագա որևէ դիվանագիտական բանակցության:¹⁹ Իսկ այժմ փորձենք պարզաբանել, թե ինչու էր Ներսես Լամբրոնացին մանրանկարում լուսապսակով հանդես գալիս:

1. Հայկական եկեղեցիներում սովորույթ է եղել սրբերի շարքում պատկերել նաև կաթողիկոսներին:²⁰ Ճիշտ է, Լամբրոնացին կաթողիկոս չէր և 1175թ.-ից Տաթևոնի նահանգի արքեպիսկոպոսն էր, սակայն այնպիսի հռչակ էր վայելում երկրում, որ յուրաքանչյուր պետական կարևոր նշանակության հարց առանց նրա մասնակցության չէր լուծվում: Այս առթիվ Մ. Օրմանյանը գրում է. «Ապիրատեն (1194-1203թթ. կաթողիկոսական աթոռը զբաղեցրած Գրիգոր Զ Ապիրատ-Լ.Պ.) ասելի ժիր էւ գործունեայ էր իր քեռորդին Ներսես Լամբրոնացի Տաթևոնի արքեպիսկոպոսը, տակաւին հագիւ քառասուն տարեկան, որուն ամէն եկեղեցական և

¹⁸ Այստեղ կարող է հարց ծագել՝ եթե Լևոն Մեծի միջամտությունը երկու եղբայրների հակամարտությանը տեղի է ունեցել միևնույն Լևոնի թագադրվելը, ապա ինչու է վերջինս մանրանկարում թագով պատկերված: Ենթադրելի է, որ մանրանկարն ստեղծվել է հետագայում, հետևաբար ով էլ որ լինեւր հեղինակը, չէր կարող մեր հռչակավոր թագավորին առանց թագի պատկերել:

¹⁹ Կարծիք կա նաև, թե Լամբրոնացին վախճանվել էր Լևոնի թագադրման արարողությունից առաջ, և, ըստ այդմ, Լևոնի՝ թագավոր հռչակվելը դրվում է 1199թ. հունվարի 6-ին՝ հիմք ընդունելով թագադրման հանդեսին ներկա գտնված և հանված հիշատակված 14 եպիսկոպոսների շարքում Ներսես Լամբրոնացու անվան բացակայության փաստը (Օրմանյան Մ., նշվ. աշխ., էջ 802-804:)

²⁰ Հայկական մանրանկարչություն. Դիմանկար, էջ 6:

քաղաքական գործերու մէջ առաջնակարգ դեր վարելը տեսանք, եւ որ Լեւոնի գլխաւոր խորհրդակիցն ու գործակիցն էր, եւ որուն ընտրելիութիւնն (կաթողիկոսական ընտրութիւն-Լ.Պ.) ալ խօսուէր»:²¹ Այսպիսով, կաթողիկոս Գրիգոր Ապիրատը ստվերում էր մնացել, ինչպէս Օրմանյանն է նկատում, իր մեղմ ու վարանոտ բնավորության պատճառով:²² Գրիգոր Զ Ապիրատին հաջորդած Հովհաննէս Զ Սսեցին (1203-1221թթ.) ևս որոշիչ դեր չի կատարել Կիլիկյան Հայաստանի քաղաքական կյանքում:

2. Ներսէս Լամբրոնացին նաև մատենագիր է եղել, գիտնական, փիլիսոփա, հրապարակախոս, բանաստեղծ, երաժիշտ, թարգմանիչ, տիրապետել մի քանի օտար լեզուների (հունարէն, լատիներէն, ասորերէն, եբրայերէն, ղպտերէն): «Նա ամենէն աւելի ոգով փարած է բոլոր եկեղեցիները միացնելու բարձր՝ բայց անգործադրելի խորհուրդին»:²³ Լամբրոնացուն վստահված է եղել նաև երկրի արտաքին գործերը վարելու ու կարգավորելու պարտավորությունները, որոնց համար նա բազմիցս է ուղարկվել օտար երկրներ: Լոնի թագադրման շուրջ բանակցություններ վարելու համար Կոստանդնուպոլիս ուղարկված ղեսպանությունը նույնպէս Լամբրոնացին էր գլխավորել:²⁴

3. Լամբրոնացու հայրը Լամբրոնի ազդեցիկ իշխանական տոհմի ներկայացուցիչ էր, որից ժառանգած նյութական միջոցներով Ներսէս Լամբրոնացին օժանդակել է դպրոցներին, գրադարաններին, գրչատներին, ձեռագրերի գնմանը, ընդօրինակմանը, վանքերի, եկեղեցիների ու այլ շէնքերի կառուցմանը, հասարակական այլ կարիքների:²⁵

Անկասկած, նման բեղմնավոր գործունեություն ծավալած պետական ու եկեղեցական ակնառու գործիչն իր ժամանակակիցների կողմից պետք է, որ ընկալվէր և ընկալվել է որպէս Սուրբ: Ինչպէս հայտնի է, Ներսէս Լամբրոնացուն մեծաբել են «Տիեզերական վարդապետ», «Միրելի», «Սուրբ» մականիւններով:²⁶ Ավելին, Լամբրոնացին ժամանակին Կոստանդնուպոլսում դասվել է տոնելի սրբերի շարքը:²⁷ Հույներն ու հռոմեացիները կոչել են նրան երկրորդ Պողոս առաքյալ Տարսուսացի:²⁸ Հայ եկեղեցին Ներսէս Շնորհալու հ երա անվանակից ու աջակից Ներսէս Լամբրոնացու հիշատակներին տոն է սահմանել, որը կոչվել է «Ներսիսյանց»:²⁹

Այժմ պարզաբանենք, թէ ինչու մանրանկարի տակ բերված ծանոթագրությունը չի համապատասխանում մանրանկարում պատկերված իրողությանը: Ըստ երևույթին, գրությունն արված է ոչ թէ մանրանկարչի կողմից, այլ ավելի ուշ՝

²¹ Օրմանյան, նշվ. աշխ., էջ 776-777:

²² Նույն տեղում, էջ 809:

²³ Նույն տեղում, էջ 802:

²⁴ Միքայելյան Գ., նշվ. աշխ., էջ 157:

²⁵ Աբգարյան Գ., Գրիգորյան Գ., Ներսէս Լամբրոնացի, Հայկական սովետական հանրագիտարան, հ. 8, էջ 253:

²⁶ Նույն տեղում, էջ 254:

²⁷ Օրմանյան Մ., նշվ. աշխ., էջ 802:

²⁸ Հայրը եկեղեցու սրբերը և սրբակենցաղ անձինք, կազմեց Ռ. Մաթևոսյանը, Ս. Էփրեմյան, 1999, էջ 188:

²⁹ Նույնը:

հետագայի միջամտություն է, որը կատարված է ոչ այնքան բանիմաց ու զրագետ անձնավորության կողմից: Դրա վկայությունն են տառերի անհամաչափությունը և գրվածքի՝ նկարի հանդեպ ոչ սիմետրիկ տեղադրությունը: Գրությունը կատարյալ ու անթերի կլիներ, եթե գրված լիներ նման տաղանդավոր վարպետի կողմից, ինչպիսին է մանրանկարի հեղինակը, որի գործն ինքնին բարձր արվեստի նմուշ է:

Այսպիսով, ամբողջացնելով պատկերը, կարելի է եզրակացնել, որ մանրանկարը հեղինակել է կիլիկյան մանրանկարչական դպրոցի ներկայացուցիչ, ով քաջատեղյակ է եղել Լևոն Մեծագործի իշխանության տարիներին երկրում տեղի ունեցած քաղաքական, ռազմական, եկեղեցական ու դիվանագիտական անցուդարձին և դրանցից մի՝ դրվագ վավերացրել իր ձեռքի աշխատանքում, որտեղ պատկերված են ոչ թե Մովսես Խորենացին՝ «Հայոց պատմութիւն»-ը գրելիս, պատվիրատու Սահակ Բագրատունին և ձեռագրի ստացող Ներսես Գևունեցին, այլ, ըստ երևութի, Լևոն Մեծագործն ու Ներսես Լամբրոնացին, իսկ նրանց ոտքերի տակ՝ ծնկաչաք կցվածքով Լևոն Մեծագործի օգնությանը դիմած և գերիշխանությունն ընդունած Իկոնիայի սուլթան Խլիճ-Արսլանի որդի Մուղիս եղին Տողրուլշաքը, ով, Ղուրանի առջև երդվելով, իր հպատակությունն է հայտնել Լևոն Մեծագործին:

ПОПЫТКА НОВОЙ ИНТЕРПРЕТАЦИИ ОДНОЙ МИНИАТЮРЫ

___ Резюме ___

___ Л. Петросян ___

В городе Хизан (губерния Мокк) была найдена рукопись, миниатюра которой, согласно принятому мнению, изображает родоначальника армянской историографии Мовсеса Хоренади во время работы над книгой "История Армении". Напротив Хоренади сидят якобы марзпан Армении (181-182гг.), заказчик произведения Саак Багратуни, а под ногами Хоренади и Саака Багратуни, на коленях стоит получатель рукописи Нерсес Гнунеди.

Видимо, такое содержание миниатюре приписано по недоразумению, потому что присутствующие в нем образы с киликийской царской короной и мусульманской чалмой, как и вообще, миниатюра в целом, нас переносят совсем в другую среду и эпоху. По нашему мнению, миниатюра отображает подписание соглашения, которое состоялось между Киликийским царем Левоном II (1198-1219гг.) и владельцем Альбистана Мутис эд-дин Тогрулшахом (1192-1201гг.), одного из престолонаследников Иконийского султаната. Последний поссорился со своим братом, прибыл к Левону и поставил себя в зависимость от него. Взаимные обязанности, по-видимому, записывал выдающийся деятель своего времени Нерсес Ламбронаци.

Տեղեկություններ հեղինակի մասին

Պետրոսյան Լուսինե Սարգսի - պ.գ.թ., ՀՀ ԳԱԱ

Շիրակի հայագիտական հետազոտությունների կենտրոն.

ԳՊՄԻ պատմության և իրավագիտության ամբիոն.

E-mail: Yahel996@mail.ru